

璧水羣英待問會元

壁水羣英待問會元卷之八

聖學門

聖學

名流舉業

**立意發端** 聖學學於誠明○開聖學之高者其明乎成聖學之粹者其誠乎天邦國家挺生聖哲資稟抱負萬萬於臣庶聖神如堯濬哲如舜智如禹湯聰明如文武此明也天所付也以之稽古則遐邇幽邈之政吾之心可以會之以之慮天則杳冥昏默之理吾之道可以通之見與之融而口耳特其寓也識與之合而歲月特其迹也聖學之所以高其自天而開之歟天明者必誠明而不誠非明之至也彼明之至者真

知夫天資之易以晦蝕而吾心之不可少縱弛也故一日之  
乾乾二日之兢兢以至于純而不已終始惟一此誠也君所  
存也嗜欲足以爲吾之蠹而吾近端人正士之時多則嗜欲  
不能蠹矣驕縱足以爲吾之賊而吾守閑邪謹獨之戒堅則  
驕縱不能賊矣常使道義之獲勝而學問之有得日復日歲  
復歲而吾身雍容於聖經賢傳之中則聖學之所以粹其由  
已而成之歟

學貴體用兩全○通經博史以達治國平天下之用此聖學  
之所形見也誠意正心以究治國平天下之本此聖學之所  
據依也自昔帝王明道以學會道以心自其本而發諸用自  
其所據依而發於其所形見先後本末未嘗少舛平時之所

講學要亦於自本自根之地而加之意耳心也者其諸義理之所會而聖學之所宗乎是故視聽言貌之必敬出入起居之必欽懼其一之不誠或有以膠擾此心游逸淫樂之必戒盤田荒寧之不敢懼其一動之弗謹或有以縱放此心君心既正由是推之身可以修家可以齊則此心之敬也君子以進小人以退則此心之明也名分必嚴所以遏亂萌則禮之根於心也政事必修所以攘夷狄則義之根於心也民隱之必加恤天變之必加懼則仁智之根於心也諸妄悉除表裏洞徹一真恬淡常如其初則心學之粹極於高明推而廣之有餘用矣而又何憂乎政治之有闕民俗之告病士習之不醇哉

聖學守約施博○貫天下之事於一理會天下之理於一心  
此帝王守約之學也以一心而燭天下之理以一理而準天  
下之事此帝王施博之功也夫自隆古以迄于今其間國勢  
之盛衰生民之理亂天運之推移人事之因革凡著於經史  
之所傳者蓋不勝其多事也苟不能貫事於理會理於心則  
茫然無所統紀以守之所以貴乎約也然前世之得失今日  
之龜鑑也往事之是非後來之軌則也凡有得於經史之所  
傳者非徒以廣多聞也苟不能推此心以度理充此理以揆  
事則泛然幾於無用此施之所以貴乎博也

學有莫大之用○王道有本原行道有功用則天下之滯可  
以不滯而本矣蓋道無近功惟志趣之高遠端緒之整齊其

功道非小用惟力量之凝定者爲足以大其用自有天地以來所以脉絡世教綱維人極於不泯不絕之地者皆非偶然之故也。一太極之理流行散見於萬類之殊常人得之由之而不知者也故必有待於超出乎億兆人之上者爲之君師焉以一人之心融天地之心以天地之心覺天下後世之心帝王之爲帝王同此心也亦同此道也同此學也亦同此功用也然則有帝王之心者斯能有志於帝王之道有帝王之學者亦豈不能進於帝王之功用

**稽古偉議**帝王有用之學○道與心一帝王之心與萬世一堯之授舜舜之授禹三聖授受相守一道載之於書人心道之分惟危惟微之辨或生於形氣之私或原於性命之正惟

其形氣之並生雖上智不能無人心惟其性命之各正雖下愚不能無道心故人心每患於難制而道心每患於難明難制故危而安之者常寡難明故微而知之者幾希惟精則決擇詳審而致治之功深惟一則主宰堅定而力行之用久是以一中之執萬世惟允成湯傳之爲昭德建中文武傳之爲順則建極帝王之治所以蒸爲雍熙董爲泰和而無一民一物之不得其所者皆此道之功用也夫以功用之散於天下者若是其明著而根本之斂於一心者猶不敢廢夫講貫之功故堯舜禹湯文武之所以號爲汲汲於學者果爲何事也文帝暗與道合○文帝天姿莊厚與道暗合者蓋多衣不曳地之儉與克儉于家同一軌轍允恭元默之恭與溫恭允塞

同一機括德化專而風俗厚肉刑除而禁網疎視生而不傷厚而不困者同一源流雖曰未學吾必謂之學矣況猶不忘於命博士刺六經乎我孝宗所以謂人君知道者少而獨有取於文帝也

武帝表章無益○武帝之興憲章六經統一聖真不可謂不知學矣然欲威四夷而不知求於虞廷之舞干欲富中國而不知求於周郊之井地欲獲長年而不知求於詩人之萬壽萬年蓋學焉而不知道故也上以虛文倡下以虛文欺霜降水涸悔及輪臺亦晚矣

**法祖嘉猷**祖宗有用之學○帝王之心與天地一祖宗之心與帝王一帝王代天地以裁成其化者也祖宗法帝王以通



會其用者也故求帝王之治者當求帝王之道求帝王之道者當求帝王之心心法明則道法著矣道法立則治法舉矣世去古遠正學不傳生民不見帝王之澤至治之王蓋不世出而天地之生聖人乃間見於千載之後藝祖皇帝肇造區夏撥亂立極讀書而歎後世刑網之密蓋有以契夫天地生育之心矣仁宗皇帝紹休聖緒繼體守文講易而得六情六氣之說蓋有以契夫天地動靜之心矣夫以祖宗講明學問稽式帝王既無一而不契於天地之心則夫兩間之所以眷佑於國家而遺皇上以無疆之休者要非人力之所倖致也藝祖生知好學○范太史帝學一書極言我朝所以異於漢唐者承平百三十年由祖宗無不好學故也蓋自太祖建隆

之初天造未定首幸國庠釋奠先聖其初也未嘗發揚翰墨以飾萬物而特於先聖先師之贊首加意焉其時也東征西伐未暇息馬提戈以論經理且勸宰相以讀書戒武臣以知學焉其所以示後世子孫者規模宏遠矣范公申其訓而釋之曰太祖知學之益又知君相不可以不學也太祖之訓子孫可不念哉

**時文警段**學必見於功用○苟能以帝王之心爲心則必深求帝王用力之要凡六經之所載得於經筵之所誦講者誠非徒以誦講爲也口以誦之必反心而載惟學以講之必聞義而力徙故於至善之所當止則必如好好色使之眼明心悅可也於不善之所當改則必如惡惡臭使之影滅迹絕可

也學有如是則本原正矣本原既正則自身而家自家而國自國而天下無一政之不立無一事之不舉功用之著其可以限量計耶

學與士大夫異○士大夫之學則濟川之舟也行舟之維楫也有其具而用實致於人故幼而學則欲壯而行以益於人國也人生之學則雲行而雨施也雷動而風隨也精神心術之所運禮樂教化之藂籥也耳目舉措之所屬風俗趨向之標準也規模綱紀之所立社稷靈長之脉絡也自得之而自用之其用也孰禦哉

學毋易於昏怠○前師後講朝聽夕訪受之既多所學易至於弗固言動有書居處有戒未過而諫所學易流於或拘於

斯時也天君不清螟蟻紛集弗固者必流於縱矣易拘者或病於蔽矣夙夜惟勤寒暑不輟焦心勞思其慮易致於或疲盛衰治亂反覆辨論細大不遺其見易致於太瀆於斯時也意向不堅鴻鵠將至疲者轉而爲墮矣瀆者厭而爲煩矣

綺語駢珠

侍黼幄之邃者不徒鳴珂而曳履 觀書日具

分錦席之榮者不徒啜茗而薦果 清問夜分

牙籤玉軸爛盈几案備文物也 翠幄天開

蘭臺芸閣環列縉紳盛威儀也 鴻儒日覲

進脩之乾甫聆於耳燕樂之需已蠱其心

無逸之書方陳于前鳬鷖之誥已誦于後

淫聲慢色蕩心娛目為吾學之障靈

乘權席勢變白為黑為吾學之蝨賊

強懷自用害學也皇上亦嘗以禹之不矜不伐而拜昌言者  
思惟之乎利欲薰心害學也皇上亦嘗以湯之不邇聲色不  
殖貨利紬繹之乎盤樂怠傲害學也皇上亦嘗以文王之不  
敢盤于游田者體認之乎

當今獻策充其學之所到○恭惟皇上英姿天挺聖學日新  
自臨御以來孜孜汲汲既知求此道之用以用其心則知推  
此心之用以用天下其間大震恐大拂亂所以嬰宵旰之憂  
關玉食之抱者殆非可以一二計也皇上端居凝邃加意講  
求所以歷萬變之紛紜鎮群疑之洶湧陰以為天下國家之

計者蓋皇上求道得力處也夫求道既有所得則夫堅始者之念以就來者之圖勉今日之誠以爲後日之慮不以僅定爲無恐不以苟安爲自足凡堯舜三代之所以根柢乎盛治者是政皇上行道用力處也因其力之有所得充其力之有所用天地之眷厚矣所以答天地者當何如祖宗之托重矣所以奉祖宗者當奚若丕緒之承今幾年矣所以充拓事業者當何修而至皇上誠能因其力之有所得充其力之有所用日身而家自家而國自國而天下學之爲王者事特易易耳

學有得於箴銘○繼自今毋昵於宮掖毋嬖於儉佞以純一此聖心則不愧屋漏之旨得矣毋滯於好惡毋汨於喜怒以

涵毓此聖性則存心養性之旨得矣毋墮於沉湎而有得於  
惡旨酒之戒毋靳於作成而有得於育英才之喻推行此聖  
政宣布此聖德則班白可溫襁負可保而所謂長長幼幼者  
得所仰矣流離可復彫瘵可蘇而所謂顛連無告者得所賴  
矣自親親而仁民自仁民而愛物而所謂民吾同胞物吾與  
者可次第而及矣吾君以是而力行之大臣以是而力贊之  
夫然後宗子之責可以無愧家相之任可以無負而寫之琬  
琰非徒美也著之翰墨非徒書也

學至有用而極○帝王之學厥有本源惟謹養乎心術之微  
不徒爲誦說之務惟深探夫造端之自不徒爲外飾之求是  
故有一念之縱肆則不足以克此學有一息之間斷則不足

以充此學外廷固學矣內庭其可息乎經筵固學矣退處其  
可懈乎端人正士固與學矣便嬖使令其可與褻乎皇上有  
志於帝王之事固出於聖心之實抑帝王之所兢兢業業微  
戒無虞孳孳汲汲悠久不息者得非皇上所當深勉而不徒  
爲言語誦說之末而已耶

**生意叅結經史祖訓俱重**○嗟夫經者義理之統會也史者  
事實之明據也而文謨武烈聖子神孫之遵蹈則又有家法  
在焉使人主嘗學經矣則義理熟乎吾心以之處天下事其  
是非可否善惡去取莫不油然而各即其叙使人主嘗學史矣  
則事實著乎吾心以之處天下事其成敗得失用舍從違莫  
不犁然各當其節使人主嘗學家法矣則成憲之可監祖武



之當繩舊章之率由以之處天下事無一念不在是也是三者人主講學之實用也執事行且侍經筵其必有得於此愚也何敢言

不善學而自誤○雖然聖學固期於有用而用之難也亦久矣駕言於易之變通而妄意紛更藉口於書之柴望而甘心封禪假襄公復讐之義而稔兵革之禍鑒吳子餘祭之事而重閹尹之變慕鳳凰來儀之說而議臣由此以坐貶援刑茲無赦之語而繩下竟用於刑名是豈學問誤之哉亦用之者自誤爾方今翠幄天開鴻儒日侍經學之精微既取之以治心修身而經學之功用復推之以治國平天下豈有設施戾於講明者哉草茅私憂過計亦願吾君善用所學而已執事

幸恕其僭

故事源流

**經傳格言** 強勉學問則聞見博而知益明故曾子曰尊其所聞則高明矣行其所知則光大矣高明光大不在乎他在乎加之意而已董仲舒天子學問至於絮蕤者求善無厭也費廣廈之下細旃之上明師居前勸誨在後上論唐虞之際下及殷周之盛訢訢然發憤忘食日新厥德王吉

**歷代事實** 學之為王者事其已久矣堯舜禹湯文武汲汲

行賈誼有言人主不可不學故雖大舜聖德孳孳為善疏

湯之於伊尹學焉而後臣之孟子高宗舊學于甘盤說曰學于

古訓乃有獲惟學遜志務時敏書成王學有緝熙于光明詩

光武經學博覽前世無比馬援傳投戈講藝息馬論道樊準傳明

帝垂情古典留意經術樊準傳章帝左右藝文斟酌律禮唐

太宗銳情經術儒學序元宗尊尚經術開館置學士張說傳

**皇朝典章**太祖性嚴重寡言獨喜觀書聞人間有奇書不吝

千金求之帝即位初首幸國學次月又幸儒學復振實自

此始並長編帝自開寶以後好讀詩書嘗歎曰宰相須用讀書

人帝真宗幼尚文雅自出閣後專以講學為樂禁中游

息之所皆貯圖籍置筆硯景德二年上曰朕退朝之暇無

所用心聚此圖籍以自娛耳帝上又謂近臣曰朕聽政之暇

未嘗虛度時日探賸簡編素所耽玩仁宗天聖四年上曰

適已召孫奭等說書卿等可暫至經筵王曾曰陛下萬幾之

暇留意經術雖炎暑不輟

編長

七年上謂王曾曰兩漢書文辭

溫雅唐書終不能及也王曾退相謂曰上日省四方封奏間

閱經史見前代述作之體且善評之自昔好文之主未嘗留

意及此長神宗元豐八年史臣曰上聰明英睿聖學高遠信

必據經

孝宗詔洪邁對選德殿云獨於閑暇取尚書及資

治通鑑孜孜而讀之帝之所以帝王之所以王法其所以興

戒其所以亡口誦心惟未嘗一日輟去手也

選德殿記

**先正建論**

范祖禹上哲宗陛下今日學與不學係天下他日

治亂臣不敢不盡言之陛下如好學則天下之君子皆欣慕

願立於朝以直道事陛下輔助德業而致太平矣陛下如不

學則天下之小人皆動其心欲立於朝以邪諂事陛下竊取

富貴而專利權矣君子專於爲義小人專於爲利君子得位  
欲行其所學也小人得位欲濟其所欲也用君子則治用小  
人則亂君子與小人皆在陛下心之所召也 哲宗即位呂  
公著言修德之要莫先於學謹條上十議之裨聰明四曰講  
學天子之學與凡庶不同夫分文析字聲音章句此世之儒  
者以希利祿取科級耳人主所不當學也人主所當學者觀  
古人之所用心論歷代帝王所以興亡治亂之迹求立政立  
事之要講愛民利物之術自然日就月將德及天下漢景帝  
用晁錯術數數年之間罹七國之禍擇術不可不謹也 孝  
宗朝呂祖謙奏陛下之所當留意者夫豈鉛槧傳注之間哉  
宅心制事祇畏兢業順帝之則是聖學也親賢遠佞陟降廢

置好惡不偏是聖學也規模審定圖始虛終不迫不撓是聖學也政令威極咸出於一畫塞多門是聖學也陛下誠留意此學日就月將緝熙光明實理所在將自知而自信之

**文集卷八**

范祖禹云恭惟今朝累聖相承德澤深厚遠過前

世皆由以道德仁義文明治天下人主無不好學故也陛下歷觀前世初守之君有如祖宗之皆好學者乎由三王至于五代有如本朝之百世無疆者乎祖宗之天下陛下可不務學以守之乎 劉屏山云學有三上焉汲汲焉其次悠悠然其次懵懵然夫懵懵者非不向學也心未達也誘而達之矢去川決安知懵懵不為汲汲者耶故悠悠者最為害道既已知之玩習為常始焉色受聽竦終焉意銷氣壞因循苟且一

暴十寒雖皓首沒世猶夫人也吾觀古聖賢之心異途同轍然而進修之速未有如湯之盤銘曰苟日新日日新又日新夫豈有瞬息悠悠意度哉樂善如貧契理如函聞非如獲利捨過如遺蛻德必日新也望山者其高蒼蒼望水者其遠茫茫振屨而升蒼蒼彌高鼓棹而游茫茫愈遠然後知向所覩未盡也學之日新亦猶是已緝熙不已造次無忘舊習進連而消至趣循循而入欲罷不能莫知所以然而然耳

## 聖學二

以真實有用立說

**策頭**典籍之遇帝王典籍之幸也謂其將以用之也得遇帝王而帝王不善用則猶其不遇也與其遇而猶不遇則寧與經士學士俱隱於山巖壁壑間爾無寧使妄意紛更者籍口

於變通其心封禪者駕言於柴望則過所以重典籍之不幸矣

**策段**漢唐之君講學之禮雖隆講學之意浸失觀其博士議郎專掌顧問郎中郎出入宿衛御壺之掌至狎也而孔安國爲之治事黃門至褻也而楊雄居之蓋燕閒之地未嘗廢夫規誨之益以至石渠之論金華之說書白虎之著爲邇議其所以訪問諸儒斟酌道德者亦至矣房杜諸臣分番殿左褚馬名士勸講禁中或宿閣下而給以珍饌之寵或居列館而命以車馬之隆議論周禮講求王道得失若井田若封建則終不能行究觀漢唐之世以蕭太傳之賢不免死於非類之手以魏鄭公之良臣終不能弭其身後之謗則授尚書於



兒寬而不能蓋其窮兵之失受經史要錄於鄭澣而不能去其褻近之人固應有是豈非以講學爲虛名乎

讀尚書之去四凶則嘆後世刑網之密讀易之太卦則知君子小人之所當辨聞直哉史魚之句則悟君子之不如直聞辟以止辟之語則謂不若使民自化聽謙德之對則知孟子是心足以王矣之言論三德義用則知任賢去邪之在剛家法所得固未嘗有一日不務於學亦未嘗有一日不見於行豈非不徇漢唐之虛名而有得於三代之實用乎

人主之學在乎簡而知要博而通用遠觀前世治亂盛衰之迹近稽祖宗垂統繼治之意因已然而考其理亂因理亂而鑒其得失其得也吾從而法之其失也吾從而戒之不徒誦

陳編之糟粕而必見之於設施不徒膠一時之聞見而必充之於踐履如是則為有用之學苟惟隆好學之美名矜稽古之盛禮廣屢細旃非無儒紳之勸誨也而求其有真實之補益者未聞牙籤玉軸非無經筵之輔導也而求其有痛快之發明者未見學問自學問躬行自躬行卒之口耳誦習之所學者雖可觀而天下國家之所關者無足賴人主亦何樂於為此也

**事師**師也者所以學為君也記曰三王四代唯其師事師傳說

曰玉人來多聞時惟建事學于古訓乃有獲事不師古以克

永世匪說攸聞命漢宣帝帝王圖籍日陳于前思惟世務將

興太平王吉傳唐太宗欲知前世得失詔魏證等哀次經史帝

王所以興衰者上之帝曰使我稽古臨事不惑公等力也德

本朝太宗興國七年上曰朕惟喜讀書開卷有益每見前

代廢興以為鑑戒 淳化二年上曰朕年長他無所愛但喜

讀書多見古人成敗善者從之不善者改之並寶訓 高宗紹興

十一年上曰有帝王之學有士大夫之學朕在官中無一日

廢學然但推究前古治道有宜於今者要施行耳贈上論經

術因曰朕每讀書未嘗苟簡必思聖人所以立言之意讀書

不適用則不若愚人愚人猶無過讀書不適用為患更甚聖

孝宗淳熙六年上曰朕於機務之外猶有暇時只好讀書唯

讀書則開發智慮物來能名事至不惑觀前古之盛衰考當

時之得失善者從之不善者以為戒 十三年上曰自古人

主讀書少有知道知之亦罕能行之且如與人不求備檢身  
若不及二句人君豈不知自是不能行政並聖

聖學三

一 以持久有成立說

**策頭**自強不息以勿忘爲心然後能勉勵以求聖學之進厥  
修罔覺以勿助爲心然後能優游以待聖學之成蓋進修有  
時時過則難成不勉勵以力其進是忘也成就有時時至而  
自化不優游以俟其成是助也易之有乾君之象也而言君  
子進德修業欲及時非勉勵以力其進乎蓋惟勉勵以力其  
進則學問有新功其得也勿忘之謂也易之大畜亦君之象  
也而言多識言行以畜其德非優游以俟其成乎惟優游以  
俟其成則學問有深功其得也勿助之謂也

策段武帝甫年二十而履帝位文皇未弱冠而成帝業此正  
未遑他務孳孳求道之時也表六經以崇聖道開文館以禮  
名儒愚於二君無憾也夫何上嘉下樂徒事虛名而清明之  
念已鴻鵠於建元之末年始勤終逸自足小効而仁義之途  
遽荆榛於正觀之四載此心一惑雖有勉強行道之說高明  
光大在加意之說與夫漸不克終之戒日夕呼於左右而鼓  
瑟好竽亦終落落難合矣故二君之成就卒有歉於其初焉  
恭惟藝祖皇帝開創以來一以無逸爲家法至仁宗皇帝不  
惟有天下太平宮中逸樂豈敢如此之言而無逸之言施於  
講讀閣者則又有孫奭之奏焉孝宗皇帝不惟有幾務之外  
猶有暇時只好讀書之訓而敬天有圖旣知所戒無逸上書

又知所法焉故四十二年之間至久也而兢業不間於始二  
十八年之治至遠也而勵精不替於終此蓋得傳心之學與  
聖子神孫所當取法焉者也

人主之學問最患有以轉迂之一有所壘則游畋聲色皆足  
以易其趨向讒諂嬖倖亦足以奪其操存蓋果銳之志以消  
弛勉之心以惰則改嗜易好者不獨一山水之圖而佚士良  
保身之謀類得以投其隙矣使人主之心忘覆轍之戒於其  
前貽噬臍之悔於其後是豈無所以而基之乎

**事科**

傳說告高宗曰惟學遜志務時敏厥修乃來又云念終

始典於學厥德修罔覺

書說

成王日就月將學有緝熙于光

明

詩敬漢光武數引公卿郎將講論經理夜分乃寐本唐太

宗即位殿左置弘文館悉引內學士番宿更休聽朝之間則與討古今道前王所以成敗或日晷夜分未嘗少怠唐儒本朝太宗雖在軍中手不釋卷長編太宗聽政之暇觀書為樂每至夜分命呂文仲直禁中備顧問訓讀真宗每視朝之暇即令講說嘗曰勤學有益頗勝他事以日繼時寧有倦耶讀仁宗皇祐三年謂講讀官朕雖盛暑亦未嘗倦丁度曰陛下即位三十年孜孜聖學繼哲宗元祐六年上曰宮中消日惟是觀書王巖叟曰聖學要在專勤屏去他事同高宗紹興七年上曰朕喜春秋之學率以二十四日讀一過居常禁中亦有日課聖孝宗淳熙六年上曰朕於機務之外猶有暇時只好讀書開發智慮政

聖學四

以講官得人立說

**策頭** 日就月將黽勉問難此人主好學之誠心前疑後承從容勸戒此儒臣講學之忠心好學而不問不難則是東坡所謂如春禽之聲秋蛩之吟過耳而已雖旦屈九重之尊日聆萬卷之言祇具文爾奚有於學講學而不勤不戒則是明道所謂能文官人可備勸講知書內侍可充輔導何用精求賢德哉雖日環千官之侍日講五車之書祇尸素耳奚補於學

**策段** 欽明文思如帝堯濬哲文明如大舜天資之聖如此而摠章之訪君疇之學其講學以人者為如何湯之齊聖廣淵文王之聰明齊聖大資之聖如此而盤銘示訓阿衡執學詢于八虞咨于二虢其講學以人者為如何夫是以聖治極功



焜耀千古盛德大業冠冕百王是皆因天資而加學力而又  
勸講之得人者也

講臣之格君心固不可不盡其職而講臣之養君德尤不可  
不盡其心翠幄天開鴻儒日侍言必善言行必善行則君德  
日盛君心日純凡所施爲凡所措置渾渾乎大理之中心過  
且無行過何有吾恐不待乎恐懼而自無愧於暗室屋漏之  
中矣昔伊川先生被命之初首以輔養之道不可不至爲言  
則伊川之心心乎愛君者也今日之居講筵者能以伊川之  
心爲心則將進吾君爲堯舜之君矣

惟我祖宗以中庸爲自脩之本以大學爲入德之序法天道  
於乾節人欲於損無逸之書於左孝經之圖於右非所以涵

養聖性而日新君德乎故雙日御經筵者常程也而隻日亦不廢五月至八月罷講者故事也而或詔勿罷其資人之勤者所以成吾修身之實也有翰林侍讀矣而又有侍講有文章閣侍講矣而又有崇政殿說書其資人之博者所以充吾修身之實也

**事類**

堯學於君疇舜學於務成昭禹學於西王國荀湯之於

伊尹學焉而後臣之子孟成王召公為保周公為師紹漢高祖

陸賈時時前說撰詩書對兒寬見武帝帝曰吾始以尚書為

樸學耶好及聞寬說乃從寬問一篇歐陽成帝時鄭寬中張

禹朝夕入說尚書論語於金華殿中前叙肅宗垂精游神包

舉藝文屢訪羣儒咨故老班固唐太宗作文學館收聘賢才

討論墳籍傳

本朝真宗置翰林侍讀學士以呂文仲為之

置侍講學士以邢昺為之設直廬於祕閣夜則迭宿召對詢

訪或至中夕緘仁宗即位初詔雙日御經筵自是雖隻日亦

召侍臣講讀王曾以王新即位宜近師儒故令孫奭等入侍

哲宗元祐元年程頤奏天下治亂係宰相君德成就在經筵

由此言之安得不重並同高宗紹興二年上曰儒臣講讀若

其說不明如夢中語耳何以發朕意將來開講令胡安國兼

讀春秋隨事解釋不必作義朕將咨訪建胡安國靖康上殿

劄子臣聞明君以務學為急聖學以正心為要心者事物之

宗主揆事宰物之權也分章析句牽制文義無益於心術者

非帝王之學也

其獻策收結等段並見第一套

壁水羣英待問會元卷之八

壁水羣英待問會元卷之九

聖學門

經筵

附

講周易

講尚書

講毛詩

講周禮

講禮記

講春秋

講語孟

講通鑑

讀祖訓

名流舉業

立意發端君相經筵之責○講明大中之道在人主推廣大

中之學在大臣開明大中之學在儒臣夫黃屋邃深丹禁密  
勿親御經筵訪問儒雅風雨不更寒暑不易爲人主者孰不  
知以講學爲務然朝夕之所講論未必能允合於大中之道  
使其果合於是道也則宮庭之踐履朝廷之政令正而不流

於偏勤而不至於怠聖經之旨不勉而中不思而得矣故曰  
講明大中之學在人主魚水交歡風雲際會都俞吁咈開導  
誘掖爲大臣者孰不以推廣聖學爲務然而設心措慮之際  
未必盡能允合於大中之道使其果合於是道也則翊扶聖  
德進退人才公而不流於私正而不失於邪自然納君於道  
而措天下於太山之安矣故曰推廣大中之學在大臣廣廈  
細旃峨冠博帶進讀經史迭講唐虞爲儒臣者孰不知以開  
明聖學爲務然而發言立論之際未必能盡得乎大中之道  
使其果得是道也則發揮聖經開廣聖性直而不流於激和  
而不失於迂自然引其君以當道而敷錫厥庶民矣故曰開  
明大中之學在儒臣

經筵宰相相關○佛時仔看從容勸戒以講明聖學之本原者此經筵事也格王政事左右輔弼以推行聖學之功用者此大臣事也蓋澄原端本乃時政之所由以成而功用之著見要皆自典學中來二者之職實相綱維故有是本原然後有是功用本原之弗究則廣廈細旃朝講夕說徒爲虛文功用之弗充則秉鈞當軸輔德納誨果將奚望然則職在經筵而或及於時政身居相位而慮關乎聖學其體統之相維脉絡之相貫夫抵同出於正君心同出於立政事同出於濟天下而福生民前師後誦左經右史非觀美也三公論道一相總職非具員也而況夫人主之學所學何事天命之去留係焉人心之離合關焉君子小人之進退皆於是乎出焉獨可

謂職勸講而無預於時政身鼎鼐而不致念於聖學乎

**稽古偉議**

古人隨寓而學○隆古盛時內庭之中宿衛環列

無非吉士侍御僕從罔非正人雖內庭大臣所不至之地而所用之人盡屬於冢宰其間又有師氏之職常居路門之近保氏之職專守王闈之列內史之職以文史討論詔賛於其間蓋不惟外廷而後親儒者公朝而後聞正論也當是時經筵雖未特設而從容密勿無非講論之地講官雖無常員而左右前後無非講學之士儒者列於內庭則不待宣召而足以備顧問內庭統於冢宰則內外相關而足以知其起居動息此所以君德成就氣質變化而日入於善也

唐朝經筵之制○登瀛州而與宴游者有弘文之學士侍禁



廷而備顧問者有更宿之京宮太宗銳情經術非不至也然與宴游者有定員則經明行修而不得預於宴游者固無階而啓沃矣況談經於宴游之席者未必皆賢耶侍禁廷者有常數則懷材抱藝而不獲造於禁廷者固無路而責難矣況待問於更宿之廬者未必真儒耶古人隆師重道之意倡不如是也居書院而修書者列學士之清選耨耆儒而質史者峻侍讀之穹班明皇之尊禮經士非不厚也然必學士而後可以勸學則抱格君之業而不獲列於學士者多矣況學士未必能勸學乎必侍讀而後可以談經則蘊致主之學而不獲廁於侍讀者衆矣況侍讀未必能明經乎古人導德樂義之意似不如是也

法祖嘉猷隨寓親近儒臣○昭素之命置席便殿則太祖之制也孫奭之召讀書胃監則太宗之制也徽之之儔直廬殿閣則又真宗之典也

祖宗以學為急○天聖元年仁宗即位之初也十一月始御崇政殿召馮元等講論語元豐八年哲宗即位之初也十二月始開邇英閣召呂公著等講經史夫我仁皇哲宗嗣位以來意其天下之事叢焉如毛豈無所當急者顧乃他務未遑汲汲於此誠念夫今日學與不學乃他日治亂之所關為人君者密勿禁庭自學之外初無他事況學之有益於人而係於天下者甚重詎可忽哉

元祐經筵之盛○恭惟元祐天子內稟母訓外登舊人肆開

經筵博諮鴻碩而一時名公實首茲選自今觀之陳聖道十  
事始於畏天愛民終於去奢無逸者呂公著也而取尚書論  
語孝經切於治道者百篇以進亦公著焉講觀文鑒古圖三  
朝訓鑒圖可見帝王美惡之迹者范祖禹也而集仁皇訓典  
書以備觀法且願以至誠好學為先亦祖禹焉以至國家典  
章大抵襲唐則采唐書故事日進者頌其人也陸贄論諫舉  
合事宜則請取陸贄奏議進呈者試其人也

**時文警段**勸講惟務其實○上之講學誠求進修下之勸學  
實務開掖則聖經祖訓冀其兼悟可也納約自牖求其經要  
亦可也增負迭侍常切規儆可也藏脩游息從容中道亦可  
也

學不專於講說○刺經以作王制非不知學也而黃老清淨之習得以汨之故文帝之治知富而不知教詔諸儒論五經同異非不知學也而雜伯刑名之習有以錮之故宣帝之時見刑而不見德以銳情經術之君而躬行仁義之不終以無逸爲圖之主而改爲山水以自逸則雖石渠白虎之開弘文集賢之置祗見其地之爲文具爾雖廣廈細旃之講前師後儒之延但見其官之爲具員爾學無得於心傳之初而僅止於講說之美觀此其治所以止於漢唐歟

講臣朝夕與處○西廡北閣天子燕閒之所而講臣引召於其間後苑之嚴天子游豫之地而學官與講於其間名儒碩德日侍經筵親學士大夫之時多親宦官女子之日少諫官

雖不在內而戶庭則無壅矣

語駢珠

經幄天開 牙籤玉軸爛盈几案侈文物也

鴻儒日侍 蘭臺芸閣環列縉紳盛威儀也

經帷密勿冕旒天臨 侍黼座之邃者不徒鳴珂而曳履

黼座雍容縉紳日侍 分錦席之榮者不徒啜茗而薦果

古者自上而下無非勸學之賢至後世有定職矣

古者自內而外無非講學之地至後世有定所矣

曉曉之誦時徹冕旒

琅琅之音日盈殿宇

翠幄敷陳 鴻儒講論

六經者禮義之川藪學術之淵源

傳注者聖言之薄蝕大道之蠹魚

毋以傳注為疑一以經學為本則罷逐百家何疑乎武帝排抑公穀何尤乎鄭賈

**當今獻策不當徒務誦說**○帝王之學厥有本原惟謹養乎心術之微不徒為誦說之務惟深探夫造端之自不徒為外飾之求宮庭深邃燕逆易生聲色滿前志念易汨四海九州之大非空言所能維持一日萬幾之繁非小智所能經理然所以維持而經理之者其本當於聖心運量之中其用形於聖學貫通之後則是心不可以不盡學不可以不充也久矣故有一念之縱肆則不足以充此學有一息之間斷則不足

以充此學外廷固學矣內廷其可息乎經筵固學矣退處其  
可懈乎端人正士固與學矣便嬖使令其可與藝乎

典學終有大用○皇上從事於學無間帝王稽古之美遂輩  
堯舜曩酒戒者有箴罪已有詔緝熙有記誠意正心之學視  
古人真可以無愧愚願始終典學懋敬厥德益戒謹其所不  
睹益恐懼其所不聞源之既澄則流不患其不清本之既正  
則末不憂其難理由是而修身齊家則表儀正由是而達之  
國則進賢退否而用舍明正名定分而禍亂息由是而達之  
天下則修政攘夷而內外之治舉敬天愛民而天人之符應  
以審正理以裕民生以正士習無一而不得其理皆此心之  
用耳

勸講真求補益○夫所貴乎經筵者聖經之微言奧義於是乎在師儒之箴規勸戒於是乎進人君之聰明聖智於是乎廣而不徒曰廣廈細旃以蒙其榮牙籤寶冊以耀其美浮辭蔓說以隆虛文應故事而已矣昔范公祖禹讀五子之歌再講六句以存規戒司馬公進讀通鑑則深排乎縱橫之術今日經筵之上果能因言託諷正論弼諧如二公之為乎不然則今日言聖學高妙明日言聖學非臣所及蓋王安石所以隤死於富鄭公也

**生意收結**講學尤資輔弼○雖然學爲治本治由學出經筵之勸講固所以爲聖學本原之地大臣之輔弼亦所以充聖學功用之成君臣上下切劘規警無一人不以學爲務無一



事不以學爲先元祐之盛將復見於今日矣皇上天資超詣  
聖學緝熙翠幄敷經無非鴻儒碩學之彥而格心之非又有  
元老大臣以身任之庠序諸生尚何言哉雖然請復借元祐  
之事爲今日獻側聞曩時日食爲災以在外之群臣乞於經  
筵之外間召侍臣訪議則所謂論思獻納以廣聖德者又無  
間於侍從之臣矣茲固執事責也其毋曰天下治亂責宰相  
君德成就責經筵

當去近習之蔽○然經生學士延見有限其朝夕薰染者盡  
掃除之隸也牙籤玉軸紬繹有時其左右回翔者皆貂當之  
習也自非眞見足以開天理之禍鑰定力足以遏人慾之波  
瀾則憧憧往來鮮有不溺於中者志一溺焉如愛珠玉不釋

于懷如飲醇醪不覺其醉於是淫聲慢色蕩心娛目爲學吾  
之障霾卑辭諂語承顏順旨爲吾學之荆榛乘權席勢變白  
爲黑爲吾學之蝨賊精神潛溺而不知性習交馳而莫悟自  
一身而天下皆非我有此金華說書不足以易飛燕之娛而  
裴李諸公又不如仇士良之術竒也執事以爲如何  
故事源流凡五件並同聖學門茲不再錄

經筵二 講周易

以講易體用易立說

**策頭**易之體博帝王之學既有以會其體易之用周帝王之  
治必有以充其用大哉易乎包括兩儀何莫非易總攝萬理  
何莫非易體之博者不可涯涘也有如翠幄敷經儒紳勸講  
抽先天之秘以迪聰明發畫前之蘊以資問辨卦得其象爻

悟其意毓粹精於天宇融道妙於靈臺觀易於經經固易也  
求易於身身即易也易之體寧無以會之乎然而造化雖賾  
此易彌綸人事雖著此易統理用之周者不可限量也有如  
宗主三極運量八紘俯仰兩間災沴之迭見者正賴於消弭  
周觀一世變故之沓來者正賴於支撐難者必思濟蒙者必  
思亨回氣運於險艱躋時世於康泰求端於易何易非用闡  
易於時何用非易易之用可無以充之乎

**策段**易之用不在事物間也亦不過於心上起經綸爾故必  
自強不息如乾而後可以充其用苟其精神蝕於嚮晦宴息  
則其用滯矣奚其充必輝光日新如畜而後可以充其用苟  
其光明疫於飲食宴樂則其用局矣奚其充必持以剛健必

守以中正必內君子必外小人而後可以充其用夫苟介以  
拘攣梏以私邪滯以儉柔蠱以便嬖則其用離矣奚其充  
愚也試即儒紳之鋪述仰窺聖學之高明日中見斗防壅蔽  
也我觀其象明照斯溥履霜堅冰戒陰柔也我悟其機邪枉  
斯杜錫馬三接禮元侯也我是以隆分陝之禮秩龜益十朋  
廣人謀也我是以渙求言之絲綸申備固圍用戒不虞法乎  
萃也建侯行師以順而動體乎豫也以至柄謙本復其德之  
粹如此濟蹇亨屯其志之勤如此十卦之義融會貫通一經  
之理優柔廢飮則大易之體會於聖心者固不得而窺測矣

餘段見第一套及聖學類

**事料**漢五鹿充宗爲梁丘說元帝好之今與諸易家辨論雲

傳唐代宗通易象

紀本

本朝太祖開寶三年王昭素請乾卦至

九五飛龍在天歛容曰此爻正當陛下今日之事引援證據

因示諷諫微旨上甚悅

長

太宗端拱元年召李覺進講泰卦

覺乃述天地感通君臣相應之旨上甚悅

真宗大中祥符

八年召馮元講泰卦元因推言君道至尊臣道至卑必以誠

相感乃能輔相裁成上悅持賜五品服

並長

仁宗皇祐二年

御通英閣講乾卦楊安國曰帝王與天

合

德乃乾元統天

之事豈非陛下所行之道乎講需卦位乎天位以正中也楊

安國曰九五乃天子之位以陽居尊而履中正爲一卦之主

猶陛下建皇極以御天下也

三年

講鼎卦楊安國曰鼎爲

烹飪之器上承至尊下又應初上承下施任重非據故足折

而覆餗矣上曰任人不可不重也編孝宗淳熙十一年張大經等奏因講泰卦之九二玉音有曰君子以類進而爲善小人以類進而爲惡未有無助者也講萃卦之上六玉音有曰盛極則衰亂極則治

經筵三 講尚書 以洪範建中立說

**策頭**有洪範之條目有洪範之綱領自初一而至次九自五行而至五福此洪範之條目也位四六之中而主之以五合九疇之事而統之以皇極此洪範之綱領也知條目之所由分知綱領之所自出然後可與言洪範矣蓋洪範一書古今之大法也自天不愛道洛水呈祥其字六十有五是其文略而未詳也至於箕子一篇反覆其言毋慮數百則其意詳而

文畫矣

**策段**然愚未知大臣所以推廣大中之學儒臣所以開明大中之學以仰裨聖天子學問者亦嘗無歉乎若尤未也則廟堂之上君臣之間所問荅者大中之道也所施行者大中之道也毋奮勵矯激而失之過毋巽懦畏縮而失之不及則君德純備而天下自安矣此愚所以望於二三大臣者然也帷幄之下朝夕之間所講究者大中之道也所辨難者大中之道也箴規諷詠而不失之諛鯁直切而不失之激則君德涵洪而海內自化矣此愚所望於經筵諸臣者然也

洪範之序難次於九疇而九疇之用實統於皇極皇大也極中也八疇皆言數而此獨不以數言蓋以大中之道無所不

包也故曰其綱領而論之而色而康動容貌也好德錫福公予奪也無滯無比消明黨也有會有歸絕違戾也王道無偏則正莫不正正人既富則官無不叙以至持正直則可決群議之疑公好惡則毋拂百姓之欲如綱之舉其目自張如領之挈其裘自順凡聚見於皇極之所統者無非源流帝王之心學茲非綱領之所自出乎

**事紀**

漢武帝以尚書爲樸學弗好及聞兒寬說乃從寬問一

**篇**

猶陽成帝好學張禹入說尚書於金華殿中光武受尚

**書**

略通大義明帝詔曰五更桓榮授朕尚書紀本永平二年

**丁**

鴻說文侯之命賜御衣及綬韞章帝詔賈逵於南宮雲臺

**講**

書韞本本朝太祖嘗讀堯典嘆曰堯舜之世四凶之罪止於



投竄何近代憲綱之密耶太宗淳化元年上幸國子監令

孫奭講說命上嘆曰天以良弼賚商朕獨不得耶仁宗皇

祐四年邇英閣講無逸帝曰朕深知享國之君宜戒逸豫楊

安國言舊有無逸圖請列于屏間帝曰朕不欲坐席背聖人

之言當別書置之左方四年講洪範五事帝曰人君奉天

在於修德戒謹於未形必俟天有譴告而後修德豈畏天之

道也五年講問命侍御僕從問非正人帝曰君臣之際

必誠意相通而後治道成張英宗治平四年改清居殿曰欽

明召王廣淵書洪範於屏因訪先儒論洪範得失廣淵曰張

景所說以三德爲馭臣之柄尤爲善論神宗初御經筵呂

公著進講商書至天乃錫王勇智且曰救民當如易所謂聰

明睿智神武而不殺者然後可以為盡善時上方富於春秋  
故公以好勇黷武為戒言行錄孝宗乾道二年魏杞奏皇太子  
請別講書上曰可令講尚書治國之道莫先於此君臣更相  
警戒無非日所行事朕每無事必看數篇婦四年汪應辰論  
畏天愛民上曰朕日讀尚書於畏天之心尤切 淳熙二年  
宴宰執於澄碧池上曰朕嘗觀無逸篇見周公為成王歷數  
商周之君享國久近真後世龜鑑並聖政

經筵四

講毛詩

以講明發揮立說

**策頭**考古以證今此人主講明經學而會之以心者也由內  
以及外此人主發揮經學而見之於治者也經學之功用大  
矣而國風雅頌則治道之本末源流係焉二雅之紀治詳矣

而文武宣王則周家之創業中興係焉

**策段**求治道於設施之際不若究治原於心術之微夫始於憂勤是文武治內治外之本也遇災而懼是宣王內修攘外之本也蓋心之勤惰治忽之分也心之畏玩治否之判也文武惟以憂勤一念先入於初心是以萬物致盛多之美宣王惟因遇災之後常致其警懼是以天下喜復行之化否則艱難多事之秋而宴安逸樂之是務吾恐天保采薇諸詩未必作也天災譴告之日而恐懼修省之不侔吾恐六月車攻等詩未必作也是則憂勤恐懼之心又文武宣王致治之大本而今日取法之先務也

公論不能以自伸必維持有人則公論爲可伸詩之美刺好

惡一公論之淵藪也人才者公論之所由見言路者公論之所由達國用者公論之所由急今賢者弗用用者弗賢鸞鳳方鳴鵠鶚間集而公論鬱於人才之不辨矣其視棧樸之官人同乎否乎同已者進異已者退駟馬倦鳴臺烏積噤而公論窒於言路之不通矣其祝敬之之進戒同乎否乎軍旅煩興帑藏赤立驚眼告竭鹿幣積輕而公論窘於國用之不紓矣其視魯頌之足用同乎否乎

**事紀**

漢宣帝授詩於東海漣中翁

本紀

唐穆宗以章處厚路隋

為侍讀召入太液亭講關雎

儒林

唐文宗坐延英論詩鄭覃曰

孔子所刪三百篇是已其非雅正者烏足為天子道哉夫風小大雅皆下刺上之變非上化下為之

本傳

本朝仁宗皇祐五

年帝曰朕思爲君之道善惡皆欲得聞況詩三百皆聖人所  
刪定義存勸戒豈當有避也講匪風篇曰誰能烹魚溉之金  
鬻帝曰老子謂治大國若烹小鮮義與此同否 講小旻篇

曰如彼泉流無淪胥以敗帝謂趙師民曰以水喻政其有旨  
哉並長高宗紹興十一年上曰木瓜美齊威公而載之衛國

風蓋自衛觀之威公繼絕誠可美自齊觀之威公專封亦可  
罪仲尼成人之美而掩其罪故不載之齊國風而載之衛國  
風也 孝宗淳熙六年詔漕臣通融財計有曰汝不聞黍苗  
之詩乎我任我輩我車我牛謂美召伯能成轉餉之功後世  
以是名官寧無意耶曰陰雨膏之言養民如陰雨也其卒章  
曰王心則寧言家給人足乃能安王之心也並改

其獻策收結等段並見第一套

壁水羣英待問會元卷之九

壁水羣英待問會元卷之十

聖學門

經筵五

講周禮

以聖經聖心立說

名流舉業

**策頭** 聖經之旨垂日星聖心之仁參天地以淺功近利測聖經之旨者學術之誤也以深思遠慮贊聖君之仁者責難之恭也測聖經之旨贊聖心之仁非釋經者之責乎六典著書理財莫詳焉然詳理其出而非專理其入也是何也井田之法至周大備什一之行頌聲溢矣有如閭里版圖之數田野夫家之數設官分職參稽互考而斯民自生齒以上悉登其數於天府天子拜而受其書冢宰貳之以贊其治即此一意

則九賦財賄之斂非為利也

**策段**載嘗考之鄭氏援漢事釋周制如口率出泉遂以為丁錢彼誠見漢有口賦有筭賦限年如此其嚴取數如此其倍文帝舊額之略減昭帝五口之僅蠲因事給復指為異息又未知併免其筭錢與否也然則為漢之民亦艱矣漢儒之陋訓詁之鑿一至於此千載而下至於援國服為息之說以濟聚斂之奸者長國家而務財用漢儒實啓之

載考周典冢宰制國用於九賦九貢之後必有九式均節之制一人宮室器用服食賜予之間皆有定式而百官有司之失物碎名盡得以隄防之節而後用用而復節既無泥沙之用必無錙銖之取自式法不行而後上下交征有如後世之



弊然後知周典爲百王不易之大法也。吾君勤約之風形於上下，吾相又以九式之法清財用之源，外廷對補之請可卻。州縣椿解之數必稽，則丁賦之已蠲者不復再歛。桂海冰天，永無二志，亦可助天朝之保障矣。先儒謂周禮天官非器識洪深者不足以觀之。

**事料**

唐太宗問三代損益何者爲當，魏證曰：「昔擇前代憲章，

發明王道，臣請以周典惟所施行。」翌日上曰：「朕昨夜讀周禮，

真聖作也。」首篇云：「惟王建國，辨方正位，體國經野，設官分職，

以爲民極，誠哉深乎朕思之。」不井田，不封建，不肉刑，而欲行

周公之道，不可得也。

又中子錄

禮樂事。本朝仁宗至和元年講大荒

大札，則薄征，緩刑。帝曰：「不然，天下皆吾赤子也。一遇飢饉，州

縣不能存卹餓殍所迫遂致為盜又捕而殺之不亦甚乎  
二年講視祿上謂講官盧士宗曰妖祥之興皆由人事君人  
者必在修德以承天意 嘉祐二年王洙講周禮至三年大  
比帝曰古者選士如此今率四五歲一下詔故士有抑而不  
得進者孰若裁其數而屢舉也並長 神宗熙寧二年御邇英  
閣時說書呂惠卿曰先王之法有一年一變者正月始和布  
法象魏是也有數年一變者巡狩考制度與夫修法則是也  
有一世一變者刑罰世輕世重是也上曰惠卿之言如何司  
馬光曰正月置於象魏乃舊章猶四時之首屬民讀法也天  
子恐諸侯變禮易樂故巡狩以考之新國亂國平國隨時而  
用皆非變法也

經筵六

講禮記

以講明推行立說

**策頭**講明聖經之理者若難而實易力行聖經之理者若易而實難蓋中庸大學之書聖賢垂世之指南也道統淵源聖賢脉絡互載於二書以章句而攷之固不能合異以爲同即義理而推之則不能別同以爲異蓋天下之理一而已矣以爲有二則非理也人主惟能合二書之肯要而觀之則聖賢之理得矣

**策段**明善誠身中庸之所謂機括致知誠意大學之自有源流二者似不能同然用以明善者此誠也推以致知者亦此誠也而謂二經有二理可乎人主惟能盡力行之實充中庸之誠也則位天地贊化育盡物之性無往而不可雖匹夫匹

婦亦可與行與知矣苟惟不能充是誠也則聖人猶且不知不能而況於民之反中庸者乎人主而能盡力行之實充大學之誠也則自明德以至於致知自知至以至於天下平莫不次第而舉矣苟惟不能充是誠也則忿懣恐懼或得移吾之所守好樂憂患或得以蔽吾之所見而莫知所適從矣由是言之則人主讀中庸大學之書必求以充中庸大學之誠充是誠而施於用則天下無餘事讀是書而不能充是誠則講學皆虛文此不易之論也

恭惟皇上聖德天縱問學日新而諸儒遭時遇主皆以推明實德爲急務抑何幸邪其以大學言者蓋知治國平天下自正心誠意始也其以中庸爲言者蓋知天下國家之九經自

至誠盡性始也或以正心誠意言或以至誠盡性言充廣見聞斯爲至矣繼自今必正心必誠意而究極夫治國平天下之事則無愧於大學必至誠必盡性而振舉夫天下國家之九經則無愧於中庸否則君徒以是而講習臣徒以是而勸諄而實用不究竟何補哉昔孝宗評論禮記謂中庸九經一段最關治道而朱文公傳大學章句其大旨曰外以極規模之大內以盡節目之詳凡以此也

**事料**漢文帝令博士刺六經作王制志武帝與公卿議封禪而群臣采封禪尚書周官王制之望祀射牛事不能辨明同本朝太宗淳化三年詔刻儒行篇賜近臣及京官受任於外者并賜進士孫何等令爲坐右之戒仁宗天聖五年賜

進士王堯臣等御詩及中庸篇一軸上先命中書錄中庸篇  
令張知白進讀至修身治人之道必使反復陳之 神宗熙  
寧元年先是王安石講禮記數難記者非是上以為然曰禮  
記既不皆法言擇其有補者講之如何安石曰陛下必欲聞  
法言宜改他經緘長孝宗淳熙四年上曰易詩書累朝皆講  
如禮記中庸篇凡為天下國家有九經一段最關治道聖政朱  
文公熹應詔上孝宗書致格知物者堯舜所謂精一也正心  
誠意者堯舜所謂執中也自古聖人口授心傳而見於行事  
者惟此而已至孔子集厥大成進而不得其位以施之天下  
故退而筆之以為六經以示後世之為天下國家者於其間  
語本末先後之序尤詳且明者今見於戴氏所記所謂大學

篇是也故程顥與其弟頤皆以爲此篇乃孔氏遺書學者所當先務臣願陛下留意於此

經筵七

講春秋經傳

以依經爲斷立說

**策頭**講明春秋之故實固不可以無傳發明春秋之大義又不可以拘於傳何則春秋約魯史而成書雖係之魯而所書非止一國也雖作於夫子而所述非止於一代也前後之殊時見聞之異論非攷諸三傳之所載則經之事迹亦未易以盡識此則傳之不可無伊川先生所謂以傳攷經之事迹是也若無聖經大意則在於貴中國而賤夷狄尊王室而卑諸侯正權綱而抑強僭重法度而惡改作凡昔聖人扶持世教之大意固不以傳而明亦不以傳而晦此則傳之不可拘而

昌黎先生所謂以三傳束高閣而獨究遺經者是也

**策段**故左氏考事雖精足以爲經之按而不知大義者不足  
以爲春秋之膏肓公穀義理稍精足以窺經之班而踈於考  
事者亦不足爲春秋之贅疣王氏詆以斷爛朝報廢是經於  
典章大備之日王氏之學祇自絕春秋之尊大山喬岳自若  
也胡氏作爲訓解扶此學於兵戈甫定之日胡氏之學固有  
光亦即春秋之陽和一脉所達也 昔胡文定公最爲精於  
春秋作爲訓解真得聖人之大意未嘗拘於三傳之說我高  
宗皇帝嘗觀其書深加獎異置之官中率二十四日讀一過  
其所以復興王室振起國威者皆自此書得之

**事料**

漢景帝好公羊胡毋生之學其道盛於武帝

穀梁武帝



詔曰昔齊襄公復九世之讎春秋大之前傳董仲舒制策曰

臣謹按春秋謂一爲元之意又云臣謹按春秋之文求王道

之端傳天子覽觀春秋之林司馬相如傳武帝使瑕丘江公與董

仲舒議而公孫弘本爲公羊學卒用董生於是上因尊公羊

家詔太子受公羊春秋儒林宣帝即位聞衛太子好穀梁復

立穀梁春秋明帝十載能通春秋本傳章帝即位特好古文

左氏傳詔賈逵入講北宮白虎觀帝使出左氏傳大義逵於

是謹摘左氏傳三十事尤著明者皆君臣之大義父子之紀

綱本傳唐文宗讀春秋至閹弑吳子餘祭問閹何人李訓對曰

今宦人也於是內謀剪除韓本朝真宗命學士講春秋帝

曰深資政理無如此書歸仁宗慶曆四年上問輔臣春秋二

傳異同之義賈昌朝對左氏多記公羊穀梁專解經旨大抵皆以尊王室正賞罰為意上然之並長編高宗紹興二年上令

胡安國兼讀春秋仍諭以隨事解釋不必作義朕將咨訪

三年徐俯進春秋解義至天王使宰渠伯糾來聘上謂俯曰魯威公篡立天王乃使其宰往聘失刑政矣故書名以貶之七年趙鼎言胡安國昨進春秋解必嘗經聖覽上曰安國所解朕置之座右雖間用傳注頗能發明經旨朕喜春秋之學率二十四日讀一過係年高宗朝胡安國除兼侍讀專講春秋初荆公詆春秋為斷爛朝報廢之不列於學官公曰先聖親手筆削之書乃使人主不得聞講說學士不得相傳習用夏變夷殆由此乎殆

經筵八

講語孟

以講明仁政立說

**策頭**觀孔子如有用我朞月可也之論而後知魯論之功用  
觀孟子如欲平治舍我其誰之論而後知鄒書之功用讀乎  
論孟而不知其功用不善讀論孟者也識其功用而不尋其  
根柢不善識其功用者也根柢者何曰仁而已何者洙泗講  
明言言皆仁齊梁問荅句句皆仁豈不以仁在天為元在四  
端為首三代之得天下也以仁其失天下也以不仁仁則興  
不仁則廢仁則存不仁則亡仁則榮不仁則辱

**策段**孔孟之所謂仁者言刑則必曰措刑言兵則必曰寢兵  
言賦則必曰薄賦言當世則必曰唐虞三代言軍旅則不如  
俎豆禮樂言獄訟則不如庠序學校立已則必立人達已則

必達人由其農桑隴畝推而男有餘粟女有餘布此仁之溥也由其長長幼幼推而養生送死仰事俯育此仁之暢也用此仁而得邦家則綏來動和如之何而可及用此仁而爲邦則四代禮樂將蔚乎而可觀然則魯論一書豈無用之空談也哉用此仁而行王政則有不可勝用之仁用此仁而運天下則有若反掌之易然則孟子一書又豈無用之空談也哉○矧今人君以仁立國大臣以仁立家而士大夫當以仁立身是故學孔子之學必當佩服乎節用愛人之訓學孟子之學必當充廣乎惻隱不忍之心仲舒陳任德不任刑之語吾何可以不如仲舒陳任德安牧養之責吾何可以不如龔黃誠如是也必不操苛擾之戈必不駕剝膚之車必不驅猛

政之虎而肆橫歛之蛇萌拆其枯槁可也沾濡其焦涸可也鮮麗其晦冥振興其疲劣皆可也東南三百年之社稷所恃以有立者惟仁厚一綫之脉耳詎可日朘而月削乎

**事料**

漢明帝詔朕通論語未之有明傳宣帝年十八師受論

語光武建武中包咸入授皇太子論語又為其章句傳章

帝元和二年命儒者講論語唐穆宗問學者安得其要

薛放曰論語六經之菁華也漢時首立於學官本本朝真宗

曰孔子言管仲如其仁召忽以忠死管仲不能固其節為臣

之道當若是乎神仁宗皇祐元年講無為而治者其舜也歟

帝曰若後代人君任臣得人代天工而不私者人君亦可以

無為也要皇祐元年講直哉史魚帝曰蘧伯玉信君子矣而

不若史魚之直

實事

英宗嘉祐八年呂公著講有朋自遠方來

言自天子至於庶人皆須朋友講習又講孟子今之樂猶古

之樂者必欲以禮樂治天下當如孔子答顏淵之言孔子所

言為邦之正道孟子所言救世之急務又講公劉好貨太王

好色曰公劉非好貨乃是厚民太王非好色乃是正家長哲

宗伊川講筵為說常於文義之外反復推明歸之人主

言行錄

高宗建炎八年上嘗論王道曰易牛微事耳孟子遽謂是心

足以王朕切疑之張九成曰不忍一牛仁心著見此則王道

之端倪

係年錄

孝宗淳熙八年上曰朕每守兩句恭者不侮人

儉者不奪人朕每於臣下未嘗有一毫輕侮之心皆待以禮

至於玩好之物有來獻者未嘗受之

聖政

寧宗方居潛邸時嘗

對講官陳傳良述城倉毀隔孟子講義引筆而斷曰君子小人之機須是他人君見善明用心剛方得

經筵九

講通鑑

以定體微意立說

**策頭**知有史之定體又知有史之微意而後可與言史矣善者錄之以爲勸不善者書之以爲戒此史之定體也善者不必錄惡有所不必書此又史之微意也昔夫子之作春秋因魯史之舊文立百王之大法魯史之文止於紀實而春秋則始寓褒貶故曰史文如畫筆經文如化工然而春秋之作亦有直筆其事不必皆寓褒貶於其間至於或筆或削抑揚變化微而顯婉而成章此則微意之所存春秋之大旨如此而已

**策段通鑑**

○易迂固之紀傳而為編年其倣春秋之法歟而律以春秋之法有未能盡合者何哉蓋有史之定體有史之微意定體止於紀實而微意始有褒貶屈平徬徨宗國援天引神其志非不可嘉也然投身魚腹則迹涉於奇矣留侯為太子招四皓以成羽翼而國本賴以不搖其功非不可尚也然為太子畫策以脅制其父則謀涉於譎矣此通鑑之所以不錄是之謂作史之微意至於子雲之仕莽而取投閣之辱文若之佐魏而一死不足以蓋其愆大節一虧沒齒餘恨此固不必論矣然事關於國家之大慝而不錄何以紀實不沒其惡所以為萬世事君之戒此通鑑之所以必書是之謂作史之常體由此觀之通鑑之作雖不盡合於春秋而實有得



於春秋

溫公之通鑑所以倣春秋之編年朱文公之綱目又因春秋以寓春秋之筆削通鑑以魏爲正統而綱目黜之通鑑書蜀入寇而綱目削之此真有得於春秋之法也彼蘇老泉謂後之春秋亂耶僭散耶愚未敢以爲信

**事紀**本朝神宗熙寧元年司馬光進讀資治通鑑至蘇秦約六國從事對曰秦儀爲縱橫之術多華少實無益於治

二年司馬光讀資治通鑑至曹參代蕭何爲相國一遵何故規上曰使漢常守蕭何之法久而不變可乎光曰何獨漢也失道者萬世無弊夏商周子孫苟能常守禹湯文武之法何衰亂之有正統高宗紹興六年上謂輔臣曰資治通鑑有論

名分其間去取皆有益於治道觀此書即知司馬光雅有宰相器識若通鑑止可以爲諫書耳 孝宗乾道三年上曰朕惟愛資治通鑑每斷一事不過數語而意足理暢苟輝奏通鑑最切實學上曰此乃萬世不刊之書而於人主尤切實

經筵十

讀祖訓

以心寓於政立說

**策頭**有帝王之政有帝王之心帝王之政載於一書之中帝王之心超乎一書之表載於書者其經畫設施也超於書者其精神心術也臨以君德肅以朝綱維以人才輯以吏治內而錢幣之通融外而將士之奮勵凡若是者皆記載之所可模寫也故曰載於一書之中思付託之惟艱念輿圖之未復一念之烈雷厲風飛一念之運乾旋坤轉早作夜思晝驚夕

惕凡若是者非記載之所可形容也故曰 乎一書之表

**策段**嘗讀孝宗之政必有得於孝宗之心且孝宗之可得而模寫者何如也悅親以孝講學以勤君德彰矣不以私害公不以恩廢法朝綱肅矣即位未幾首召二十八年淪棄之忠鯁而舉當世之英豪津津皆生意矣人才之翕集爲如何宰執不視事則慮其積壓給舍不封駁則導以聽從其吏治之興起爲如何多蓄見錢以通楮五舉大闕以勵兵其兵財之兼備又如何記之實錄載之寶訓侈盛德之形容彰累朝之盛事儒紳因之以勸講九重籍之以憲章是則帝王之政於一書之中者也若夫孝宗之不可得而形容者何如也洪惟我朝以巍巍配天之鉅業金甌無缺之天下運厄中天王

綱板蕩逐使一家文軌中隔華夷萬里江山半分南北痛心疾首啻奚齊城之未復枕戈待旦不止越讐之未報機會未至隱忍待時故聖訓有曰朕心一日常行天下一遭推此念也其奮發激烈之志當如何哉此非帝王之心超於一書之外者乎 我先皇嗣位以來講寶訓於經筵讀聖政於暇日乃嘉泰初年臣僚奏請有曰思孝宗燕翼之謀考孝宗已行之實一語一默一政一令必合乎孝宗嗚呼繼自今文子文孫其立政立心何可不以孝宗為法乎

**事料** 漢魏相好觀漢故事以為方今務在奉行故事而已數條漢興以來國家便宜故事奏請施行故事詔書凡三十二事 唐陸贄奏德宗願以正觀故事為模楷使太宗風烈重

光於聖代

議奏

憲宗讀列聖實錄見正觀開元故事竦慕不知

釋卷

舊史

文宗嘗讀太宗政要慨然慕之

本

宣宗書正觀政要

於屏風每正色拱手而讀之

通鑑

宣宗出金鏡書太宗所製也

曰卿爲我舉其要令孤絢摘語曰任賢享天下之福

本

本朝

仁宗景祐四年讀正說謹罰篇帝曰深文峻法誠非善政

慶曆五年進讀經武要略

哲宗元祐元年韓維讀三朝寶

訓至真宗不殺羊羔因奏言此特小善爾然推是心以及天

下則仁不可勝用也

七年范祖禹言臣嘗采集仁宗聖政

得數百事欲乞撰錄成書上進少資睿覽監成憲皆舉而行

以副群生之所願

並長

高宗紹興四年謝克家奏故翰林學

士范祖禹當元祐中終始實在經筵所著唐鑑已進卸又有

仁皇訓典帝學二書深益治道可備睿覽 九年史館言祖宗實錄已進太祖太宗餘見今繕寫上曰朕要見章聖景德中講和後故事今日可以遵行要會孝宗淳熙七年史浩侍講周必大奏事上曰讀三朝實訓幾時終篇朕樂聞祖宗謨訓日盡一卷亦未為多雖雙日及休暇亦當特坐 八年史浩譴正說正心篇論黃帝無為天下治上曰所謂無為者豈宴安無所事之謂乎又讀剛斷篇武帝知郭解能使將軍為言其家不貧上曰武帝如此可謂洞照事情又讀大中篇論為政之道本乎大中上曰勿渾渾而濁勿察察而明即此理也

並文

其獻策收結等段並見第一套

壁水羣英待問會元卷之十